

五

倫

書

御製五倫書序

朕惟天之道非二氣五行無以成萬
化人之道非三綱五常無以首萬行
三綱五常之道雖敘於天然正之使
敘倫而益厚則在於君傳曰惟天下
至誠爲能盡其性能盡其性則能盡
人之性所謂性者莫有大於父子之

親君臣之義夫婦之別長幼之序朋友之信是故親吾親以及人之親立愛自親始也長吾長以及人之長立敬自長始也堯舜禹湯文武聖聖相承所以繼天立極而致雍熙泰和之治於悠久者莫不循用是道我國家以綱常為治自

皇高祖考太祖高皇帝申明五常之誥
頒示天下

列聖相承若出於一肆數十年海宇乂
寧風俗醇厚良有以也我

皇考宣宗章皇帝纂承大統益隆繼述
嘗於萬幾之暇采輯經傳百家嘉言
善行之有關於君臣父子夫婦兄弟

朋友之道者類分爲六十二卷命曰
五倫書欲嘉與萬方講求其理將以
施之於身行之於家而達之於邦國
俾咸囿仁義忠孝慈良之域而後已
是即帝堯親睦九族帝舜慎徽五典
大禹祇台德先成湯肇脩人紀文武
明德重民五教之所爲也其與易之

財成輔相書之傳典綏猷中庸所謂
脩道之教豈有二哉所以然者非有
求於民生日用彝倫之外亦因其本
然而導其所當然者耳朕祇嗣天序
追承

皇考之志謹用鉁梓以廣其傳而并敘
述

神功聖德之盛播示將來於乎天地之
大日月之明綱常之道殆與之同其
久遠矣

正統十年五月初二日

五倫書目錄

卷之三
五倫總論

卷之三

君道一

嘉言上

卷之三

君道二

嘉言下

卷之四

君道三

善行

聖德

聖學

卷之五

君道四

善行

敬天

法祖

聖孝

卷之六

君道五

善行

謙德

謹戒

戒欲

卷之七

君道六

善行

節儉

惇信

剛明

卷之八

君道七

善行

禮樂

重祀

卷之九

君道八

善行

建儲

睦親

封建

卷之十

君道九

善行

德化

勤政

制治

卷之十一

君道十

善行

命官

求言

卷之十二

君道十一

善行

聽納

卷之十三

君道十二

善行

養老

崇儒

興學

卷之十四

君道十三

善行

育才

知人

求賢

卷之十五

君道十四

善行

用賢

卷之十六

君道十五

善行

仁民

重農

正名

卷之十七

君道十六

善行

報功

褒嘉

卷之十八

君道十七

善行

賞罰

去邪

卷之十九

君道十八

善行

卹刑

宥過

卷之二十

君道十九

善行

兵政

馬政

征伐

卷之二十一

君道二十

善行

命將

馭夷

卷之二十二

君道二十一

善行

貞淑

內助

卷之二十三

君道二十二

善行

治內

逮下

教育

卷之二十四

臣道一

嘉言

卷之二十五

臣道二

善行

輔德

卷之二十六

臣道三

善行

經國

卷之二十七

臣道四

善行

典禮

典銓

考課

卷之二十八

臣道五

善行

薦舉

卷之二十九

臣道六

善行

守法

卷之三十

臣道七

善行

持正

卷之三十一

臣道八

善行

剛正

卷之三十二

臣道九

善行

諫諍

彈劾

卷之三十三

臣道十

善行

忠義上

卷之三十四

臣道十一

善行

忠義下

卷之三十五

臣道十二

善行

識大體

政治

卷之三十六

臣道十三

善行

教化

正俗

卷之三十七

臣道十四

善行

卹民

撫字

勸農

平賦

卷之三十八

臣道十五

善行

決獄

卷之三十九

臣道十六

善行

備荒

救災

理財

卷之四十

臣道十七

善行

水利

屯田

卷之四十一

臣道十八

善行

奉使上

卷之四十二

臣道十九

善行

奉使下

卷之四十三

臣道二十

善行

将畧上

卷之四十四

臣道二十一

善行

將畧中

卷之四十五

臣道二十二

善行

將畧下

卷之四十六

臣道二十三

善行

禦邊

卷之四十七

臣道二十四

善行

除寇

卷之四十八

臣道二十五

善行

鎮靜

恩信

卷之四十九

臣道二十六

善行

正學

勤勵

篤行

明敏

卷之五十

臣道二十七

善行

智識

卷之五十一

臣道二十八

善行

忠謹

德量

卷之五十二

臣道二十九

善行

廉介

卷之五十三

臣道三十

善行

謙讓

不欺

恬退

卷之五十四

父道一

嘉言

善行

卷之五十五

父道二

母

伯叔

叔母

善行

卷之五十六

子道一

嘉言

善行上

卷之五十七

子道二

善行中

卷之五十八

子道三

女婦

善行下

卷之五十九

夫婦之道

嘉言

善行

卷之六十

兄弟之道

宗族

嘉言

善行

卷之六十一

朋友之道一

嘉言

善行

卷之六十二

朋友之道二

師生

善行

五倫書卷之一

五倫總論

易曰父子兄弟夫婦而家道正正
家而天下定矣○有天地然後有萬物有萬
物然後有男女有男女然後有夫婦有夫婦
然後有父子有父子然後有君臣有君臣然
後有上下有上下然後禮義有所錯
書敬敷五教在寬○后克艱厥后臣克艱厥臣
政乃乂黎民敏德○天敘有典勅我五典五

惇哉○君罔以辯言亂舊政臣罔以寵利居成功邦其永孚于休○弘敷五典式和民則詩刑于寡妻至于兄弟以御于家邦

春秋左氏傳曰君義臣行父慈子孝兄愛弟敬所謂六順也○君人執信臣人執共忠信篤敬上下同之天之道也

春秋穀梁傳曰子之生不免乎水火母之罪也竊貫成童不就師傳父之罪也就師學問無方心志不通身之罪也心志既通而名譽不

聞友之罪也。名譽既聞而有司不舉。有司之罪也。有司舉之。王者不用。王者之過也。

禮記。男女有別而後夫婦有義。夫婦有義而後父子有親。父子有親而後君臣有正。○君臣上下。父子兄弟。非禮不定。○大人世及以為禮。城郭溝池以為固。禮義以為紀。以正君臣。以篤父子。以睦兄弟。以和夫婦。○父慈子孝。兄良弟弟。夫義婦聽。長惠幼順。君仁臣忠。十者謂之人義。○父子篤。兄弟睦。夫婦和。家之

肥也。大臣法。小臣廉。官職相序。君臣相正。國之肥也。○朝覲之禮。所以明君臣之義也。聘問之禮。所以使諸侯相尊敬也。喪祭之禮。所以明臣子之恩也。鄉飲酒之禮。所以明長幼之序也。婚姻之禮。所以明男女之別也。大戴禮。夫婦別。父子親。君臣嚴。三者正。則庶物從之矣。

論語。賢賢易色。事父母能竭其力。事君能致其身。與朋友交。言而有信。○君君。臣臣。父父子子。

子

大學為人君止於仁。為人臣止於敬。為人子止於孝。為人父止於慈。與國人交止於信。

中庸君臣也。父子也。夫婦也。昆弟也。朋友之交也。五者天下之達道也。

孟子人倫明於上。小民親於下。○內則父子。外則君臣。人之大倫也。父子主恩。君臣主敬。○父子有親。君臣有義。夫婦有別。長幼有序。朋友有信。○規矩方圓之至也。聖人。人倫之至。

也○人人親其親長其長而天下平○為人
臣者懷仁義以事其君為人子者懷仁義以
事其父為人弟者懷仁義以事其兄是君臣
父子兄弟去利懷仁義以相接也然而不王
者未之有也○親親仁也敬長義也無他達
之天下也

孝經天子有爭臣七人雖無道不失其天下諸
侯有爭臣五人雖無道不失其國大夫有爭
臣三人雖無道不失其家士有爭友則身不

離於令名。父有爭子。則身不陷於不義。

管仲曰。惠者主之高行也。慈者父母之高行也。忠者臣之高行也。孝者子婦之高行也。主惠而不懈。則民奉養。父母慈而不懈。則子婦順。臣忠而不懈。則爵祿至。子婦孝而不懈。則美名附。

晏嬰曰。君令。臣共。父慈。子孝。兄愛。弟敬。夫和。妻柔。姑慈。婦聽。禮也。君令而不違。臣共而不貳。父慈而教。子孝而箴。兄愛而友。弟敬而順。夫

和而義。妻柔而正。姑慈而從。婦聽而婉。禮之善物也。

樂共子曰。民生於三。事之如一。父生之。師教之。君食之。

莊周曰。君先而臣從。父先而子從。兄先而弟從。長先而少從。男先而女從。夫先而婦從。說苑人之生莫大乎父子之親。君臣之義。父道

聖。子道仁。君道義。臣道忠。

顏之推曰。夫有人民而後有夫婦。有夫婦而後

有父子。有父子而後有兄弟。一家之親。此三者而已矣。自茲以往。至於九族。皆本於三親焉。故於人倫為重者也。不可不篤。

程頤曰。天地之間無適而非道也。即父子而父子。在所當親。即君臣而君臣。在所當嚴。以至為夫婦。為長幼。為朋友。無所為而非道。

羅從愿曰。君明。君之福。臣忠。臣之福。君明。臣忠。則朝廷乂安。得不謂之福乎。父慈。父之福。子孝。子之福。父慈。子孝。則家道隆盛。得不謂之

福乎

朱熹曰。父子兄弟為天屬。而以人合者居其三焉。夫婦者。天屬之所由以續者也。君臣者。天屬之所賴以全者也。鈞友者。天屬之所賴以正者也。是則所以綱紀人道。建立人極。不可一日而偏廢。

張栻曰。天地位而人生乎其中。其所以為人之道者。以其有父子之親。長幼之序。夫婦之別。而又有君臣之義。鈞友之交也。

黃榦曰。五典者。天叙之常禮。人道之大端也。析而言之。則君臣夫婦朋友者。人之屬。而天屬之親。惟父子兄弟為然。

許衡曰。父子之親。君臣之義。與夫夫婦長幼。朋友。亦莫不各有當然之則。此天倫也。○君知君道。臣知臣道。則君臣各得其所矣。夫知夫道。婦知婦道。則夫婦各得其所矣。

五倫書卷之一

五倫書卷之二

易首出萬國咸寧○天行健君子以自強
不息○君子體仁足以長人嘉會足以合禮
利物足以和義貞固足以幹事君子行此四
德者故曰乾元亨利貞○庸言之信庸行之
謹閑邪存其誠善世而不伐德博而化○君
子終日乾乾夕惕若厲無咎○君子進德修

業。忠信所以進德也。修辭立其誠。所以居業也。知至至之。可與幾也。知終終之。可與存義也。○君子學以聚之。問以辯之。寬以居之。仁以行之。○夫大人者。與天地合其德。與日月合其明。與四時合其序。與鬼神合其吉凶。○蒙以養正。聖功也。○能以衆正。可以王矣。○地中有水。師。君子以容民畜衆。○大君有命。開國承家。小人勿用。○地上有水。比。先王以建萬國。親諸侯。○上天下澤。履。君子以辯上。

下。定民志。○內君子而外小人。君子道長小
人道消也。○天地交泰。后以財成天地之道。
輔相天地之宜。以左右民。○火在天上。大有。
君子以遏惡揚善。順天休命。○謙尊而光。○
天地以順動。故日月不過。而四時不忒。聖人
以順動。則刑罰清而民服。○雷出地奮。豫。先
王以作樂崇德。殷薦之上帝。以配祖考。○山
下有風。蠱。君子以振民育德。○澤上有地。臨。
君子以教思無窮。容保民無疆。○大觀在上。

順而巽中正以觀天下。觀盥而不薦有孚顒若。下觀而化也。觀天之神道而四時不忒。聖人以神道設教而天下服矣。○風行地上。觀先王以省方觀民設教。○雷電噬嗑。先王以明罰勅法。○觀乎天文以察時變。觀乎人文以化成天下。○天下雷行物與無妄。先王以茂對時育萬物。○剛健篤實輝光日新其德。○天地養萬物。聖人養賢以及萬民。○重明以麗乎正。乃化成天下。○明兩作離大人以

繼明照于四方○天地感而萬物化生○聖人
感人心而天下和平○山上有澤○咸○君子以
虛受人○○日月得天而能久照○四時變化而
能久成○聖人久於其道而天下化成○○天下
有山○遯○君子以遠小人○不惡而嚴○○明出地
上○晉○君子以自昭明德○○雷雨作○解○君子以
赦過宥罪○○損上益下○民說無疆○自上下下
其道大光○○有孚惠心○勿問元吉○有孚惠我
德○○天下有風○姤○后以施命誥四方○○澤上

有地。萃。君子以除戎器。戒不虞。○木上有水。井。君子以勞民勸相。○天地革而四時成。湯武革命。順乎天而應乎人。○澤中有火。革。君子以治曆明時。○聖人亨以享上帝。而大亨以養聖賢。○木上有火。鼎。君子以正位凝命。○洊雷震。君子以恐懼修省。○山上有木。漸。君子以居賢德善俗。○山上有火。旅。君子以明慎用刑。而不留獄。○隨風。巽。君子以申命行事。○說以先民。民忘其勞。說以犯難。民忘

其死○風行水上。渙先王以享于帝立廟○
渙汗其大號。渙王居。无咎○天地節而四時
成。節以制度。不傷財。不害民○澤上有水。節。
君子以制數度。議德行○水在火上。既濟。君
子以思患而豫防之○易簡而天下之理得
矣。天下之理得。而成位乎其中矣○與天地
相似。故不違。知周乎萬物而道濟天下。故不
過。旁行而不流。樂天知命。故不憂。安土敦乎
仁。故能愛○居其室。出其言善。則千里之外

應之。況其迹者乎。居其室。出其言不善。則千里之外違之。況其迹者乎。言出乎身。加乎民。行發乎迹。見乎遠。言行。君子之樞機。樞機之發。榮辱之主也。言行。君子之所以動天地也。可不慎乎。○天之所助者。順也。人之所以助者。信也。履信思乎順。又以尚賢也。是以自天祐之。吉无不利。○天地之大德曰生。聖人之大寶曰位。何以守位曰仁。何以聚人曰財。理財正辭。禁民為非曰義。○通其變。使民不倦。神

而化之。使民宜之。○黃帝堯舜垂衣裳而天下治。蓋取諸乾坤。○精義入神以致用也。利
用安身以崇德也。○危者安其位者也。亡者
保其存者也。亂者有其治者也。是故君子安
而不忘危。存而不忘亡。治而不忘亂。是以身
安而國家可保也。○君子知微知彰。知柔知
剛。萬夫之望。○聖人南面而聽天下。嚮明而
治。

書。稽于衆。舍己從人。不虐無告。不廢困窮。○人

心惟危。道心惟微。惟精惟一。允執厥中。無稽之言。勿聽。弗詢之謀。勿庸。○衆非元后。何戴。后非衆罔與守邦。○慎乃有位。敬脩其可願。○惟德動天。無遠弗届。滿招損謙。受益時乃天道。○至誠感神。○知人則哲。能官人。安民則惠。黎民懷之。○天聰明自我民聰。明天明畏自我民明。威達于上下。敬哉有土。○元首明。哉股肱。良哉庶事。康哉。○民可近。不可下。民惟邦本。本固邦寧。○惟天生民。有欲無主。

乃亂。惟天生聰明時乂。○佑賢輔德。顯忠遂良。兼弱攻昧。取亂侮亡。推亡固存。邦乃其昌。○德日新。萬邦惟懷。志自滿。九族乃離。○能自得師者王。謂人莫己若者亡。好問則裕。自用則小。○慎厥終。惟其始。殖有禮。覆昏暴。欽崇天道。永保天命。○惟皇上帝。降衷于下民。若有恒性。克綏厥猷。惟后。○立愛惟親。立敬惟長。始于家邦。終于四海。○惟上帝不常。作善降之百祥。作不善降之百殃。爾惟德罔小。

萬邦惟慶。爾惟不德。罔大隆厥宗。○祗爾厥辟。辟不辟。忝厥祖。○慎乃儉德。惟懷永圖。○欽厥止。率乃祖攸行。○民非后罔克胥匡。以生。后非民罔以辟四方。○奉先思孝。接下思恭。視遠惟明。聽德惟聰。○惟天無親。克敬惟親。民罔常懷。懷于有仁。鬼神無常。享享于克誠。天位艱哉。○無輕民事。惟難。無安厥位。惟危。慎終于始。有言逆于汝心。必求諸道。有言遜于汝志。必求諸非道。○弗慮胡獲。弗為胡

成一人元良萬邦以貞○天難諶命靡常常
厥德保厥位○德惟一動罔不吉德二三動
罔不凶惟吉凶不僭在人惟天降灾祥在德
○德無常師主善為師善無常主協于克一
○七世之廟可以觀德萬夫之長可以觀政
○后非民罔使民非后罔事無自廣以狹人
匹夫匹婦不獲自盡民主罔與成厥功○知
之曰明哲明哲實作則天子惟君萬邦百官
承式○明王奉若天道建邦設都樹后王君

公承以大夫師長不惟逸豫惟以亂民○惟
天聰明惟聖時憲○惟口起羞惟甲冑起戎
惟衣裳在笥惟干戈省厥躬○官不及私昵
惟其能爵罔及惡德惟其賢○慮善以動動
惟厥時有其善喪厥善矜其能喪厥功惟事
事乃其有備有備無患○惟后非賢不乂惟
賢非后不食○惟天地萬物父母惟人萬物
之靈亶聰明作元后元后作民父母○天佑
下民作之君作之師惟其克相上帝寵綏四

方○惟天惠民惟辟奉天○天視自我民視
天聽自我民聽○建官惟賢位事惟能○皇
建其有極歛時五福用敷錫庶民○凡厥
庶民有猷有為有守汝則念之不協于極不
罹于咎皇則受之而康而色曰予攸好德汝
則錫之福○無虐瑣獨而畏高明人之有能
有為使羞其行而邦其昌凡厥正人既富方
穀○三德一曰正直二曰剛克三曰柔克平
康正直彊弗友剛克變友柔克沉潛剛克高

明柔克○明王慎德四夷咸賓無有遠迩畢
獻方物惟服食器用○志以道寧言以道接
○不寶遠物則遠人格○所寶惟賢則近人安
○怨不在大亦不在小惠不惠懋不懋○王
敬作所不可不敬德○肆惟王其疾敬德王
其德之用祈天永命○皇天無親惟德是輔
民心無常惟惠之懷○慎厥初惟厥終終以
不困不惟厥終終以困窮○惟聖罔念作狂
惟狂克念作聖○制治于未亂保邦于未危

○明王立政。不惟其官。惟其人。○至治馨香。感于神明。黍稷非馨。明德惟馨。○出入起居。罔有不欽。發號施令。罔有不臧。下民祇若。萬邦咸休。○德威惟畏。德明惟明。

詩人之好我。示我周行。○彤弓召兮。受言藏之。我有嘉賓。中心貺之。鐘鼓既設。一朝饗之。○夜如何其。夜未央。庭燎之光。君子至止。鸞聲將將。○君子來朝。何錫予之。雖無予之。路車乘馬。又何予之。玄衮及黼。○無念爾祖。聿修

厥德永言配命。自求多福。○明明在下。赫赫
在上。天難忱斯。不易惟王。○小心翼翼。昭事
上帝。聿懷多福。厥德不回。以受方國。○勉勉
我王。綱紀四方。○雖雖在宮。肅肅在廟。不顯
亦臨。無射亦保。○不聞亦式。不諫亦入。○永
言孝思。孝思維則。○昭茲來許。繩其祖武。○
適求厥寧。適觀厥成。○假樂君子。顯顯令德。
宜民宜人。受祿于天。○不愆不忘。率由舊章。
○威儀抑抑。德音秩秩。無怨無惡。率由群匹。

○顓顓卬卬。如圭如璋。令聞令望。豈弟君子。
四方為綱。○敬慎威儀。以近有德。○先民有
言。詢于芻蕘。○佺人維藩。大師維垣。大邦維
屏。大宗維翰。懷德惟寧。宗子維城。無俾城壞。
無獨斯畏。○敬天之怒。無敢戲豫。敬天之渝。
無敢馳驅。昊天曰明。及爾出王。昊天曰旦。及
爾游衍。○無競維人。四方其訓之。有覺德行。
四國順之。訏謨定命。遠猶辰告。敬慎威儀。維
民之則。○慎爾出話。敬爾威儀。無不柔嘉。白

圭之玷尚可磨也。斯言之玷不可為也。○無
易由言。無曰苟矣。莫捫朕舌。言不可逝矣。無
言不讎。無德不報。惠于朋友。庶民小子。子孫
繩繩。萬民靡不承。○辟爾為德。俾臧俾嘉。淑
慎爾止。不愆于儀。不僭不賊。鮮不為則。○維
此惠君。民人所瞻。秉心宣猶。考慎其相。○明
明天子。令聞不已。矢其文德。洽此四國。○儀
式刑文王之典。日靖四方。○我其夙夜。畏天
之威。于時保之。○載戰于戈。載橐弓矢。我求

懿德肆于時夏○宣哲維人文武維后燕及
皇天克昌厥後○保有厥土于以四方克定
厥家○敷時繹思我祖維求定○思無邪○
溫恭朝夕執事有恪○率履不越遂視既發
○聖敬日躋昭假遲遲上帝是祗○不競不
綌不剛不柔敷政優優○天命降監下民有
嚴不僭不濫不敢怠遑

春秋左氏傳曰為國家者見惡如農夫之務去
草焉芟夷蘊崇之絕其本根勿使能殖則善

者信矣。○禮經國家定社稷序民人利後嗣者也。○政以治民刑以正邪。○君人者將昭德塞違以臨照百官猶懼或失之故昭令德以示子孫是以清廟茅屋大路越戶括切席大羹不致粢食不鑿昭其儉也衮冕黻珽帶裳幅舄衡紃紘紵昭其度也藻率音韞補頂切鞞布孔切鞞鞞屬游纓昭其數也火龍黼黻昭其文也五色比象昭其物也錫鸞和鈴昭其聲也三辰旂旗昭其明也。○國家之立也本大而末小是

以能固。故天子建國。諸侯立家。卿置側室。大夫有貳宗。士有隸子弟。庶人工商各有分親。皆有等義。是以民服事其上。而下無覬覦。○唯器與名不可以假人。君之所司也。名以出信。信以守器。器以藏禮。禮以行義。義以生利。利以平民。政之大節也。○民受天地之中以生。所謂命也。是以有動作禮義威儀之則。以定命也。○國之大事。在祀與戎。祀有執燔。戎有受脰。神之大節也。○天生民而立之。君使

司牧之。勿使失性。有君而為之貳。使師保之。勿使過度。○令名德之興也。德國之基也。有基無壞。無亦是務乎。有德則樂。樂則能久。○善為國者。賞不僭而刑不濫。賞僭則懼及淫人。刑濫則懼及善人。○古之治民者。勸賞而畏刑。恤民不倦。賞以春夏。刑以秋冬。○君有君之威儀。其臣畏而愛之。則而象之。故能有其國家。令聞長世。○施舍可愛。進退可度。周旋可則。容止可觀。作事可法。德行可象。聲氣

可樂動作有文言語有章以臨其下謂之有
威儀也○能用善人民之主也○禮上下之
紀天地之經緯也民之所以生也是以先王
尚之○心能制義曰度德正應和曰莫照臨
四方曰明勤施無私曰類教誨不倦曰長賞
慶刑威曰君慈和徧服曰順擇善而從之曰
比經緯天地曰文九德不愆作事無悔故龍
天祿子孫賴之

春秋公羊傳曰君子之祭也敬而不黷疏則怠

怠則忘○君子之為國也。必有三年之委○
古者什一而藉。什一者。天下之中正也。什一
行而頌聲作矣○君子之善善也。長惡惡也。
短惡惡止其身。善善及子孫。

春秋穀梁傳曰。王者民之所歸往也○古之君
人者。必時視民之所勤。民勤於力。則工築罕。
民勤於財。則貢賦少。民勤於食。則百事廢矣。
○為天下主者。天也。繼天者。君也。君之所為
者。命也。

周禮惟王建國。辯方正位。體國經野。設官分職。以爲民極。

禮記。毋不敬。儼若思。安定辭。安民哉。教不可長。欲不可從。志不可滿。樂不可極。賢者狎而敬之。畏而愛之。愛而知其惡。憎而知其善。○天子祭天地。祭四方。祭山川。祭五祀。歲徧○凡官民材。必先論之。論辨然後使之。任事然後爵之。位定然後祿之。爵人於朝。與士共之。刑人於市。與衆棄之。○國無九年之蓄。曰不足。

無六年之蓄曰急。無三年之蓄曰國非其國也。三年耕必有一年之食。九年耕必有三年之食。以三十年之通。雖有凶旱水溢。民無菜色。然後天子食。日舉以樂。○用民之力。歲不過三日。○凡使民任老者之事。食壯者之食。○修六禮以節民性。明七教以興民德。齊八政以防淫。一道德以同俗。養耆老以致孝。恤孤獨以逮不足。上賢以崇德。簡不肖以綏惡。○凡制五刑。必即天論。郵罰麗於事。○德成

而教尊。教尊而官正。官正而國治。君之謂也。
○大道之行也。天下為公。選賢與能。講信修睦。故人不獨親其親。不獨子其子。使老有所終。壯有所用。幼有所長。矜寡孤獨廢疾者皆有所養。男有分。女有歸。○禮者君之大柄也。所以別嫌明微。儆鬼神。考制度。別仁義。所以治政安君也。○故天生時而地生財。人其父。生而師教之。四者君以正用之。故君者立於無過之地也。○故用人之知。去其詐。用人之

勇去其怒。用人之仁。去其貪。○聖人耐。能以天下為一家。以中國為一人者。非意之也。必知其情。辟於其義。明於其利。達於其患。然後能為之。○聖人作。則必以天地為本。○聖王修義之柄。禮之序。以治人情。故人情者。聖王之田也。修禮以耕之。陳義以種之。講學以耨之。本仁以聚之。播樂以安之。○先王之立禮也。有本有文。忠信禮之本也。義理禮之文也。無本不立。無文不行。○先王之制禮也。以節

事修樂以道志。故觀其禮樂而治亂可知也。
○聖人南面而聽天下所宜先者五。民不與
焉。一曰治親。二曰報功。三曰舉賢。四曰使能。
五曰存愛。五者一得於天下。民無不足。無不
贍者。○君子如欲化民成俗。其必由學乎。玉
不琢不成器。人不學不知道。是故古之王者
建國君民。教學為先。○禮以道其志。樂以和
其聲。政以一其行。刑以防其姦。禮樂刑政。其
極一也。所以同民心而出治道也。○先王之

制禮樂也。非以極口腹耳目之欲也。將以教
民平好惡而反人道之正也。○禮節民心。樂
和民聲。政以行之。刑以防之。禮樂刑政四達
而不悖。則王道備矣。○禮義立。則貴賤等矣。
樂文同。則上下和矣。好惡著。則賢不肖別矣。
刑禁暴。爵舉賢。則政均矣。仁以愛之。義以正
之。如此。則民治行矣。○大樂必易。大禮必簡。
樂至則無怨。禮至則不爭。揖讓而治天下者。
禮樂之謂也。○大樂與天地同和。大禮與天

地同節和故百物不失節故祀天祭地明則有禮樂幽則有鬼神如此則四海之內合敬同愛矣○王者功成作樂治定制禮其功大者其樂備其治辯者其禮具○聖人作樂以應天制禮以配地禮樂明備天地官矣○為人君者謹其好惡而已矣君好之則臣為之上行之則民從之○禮樂不可斯須去身致樂以治心則易直子諒之心油然而生矣易直子諒之心生則樂樂則安安則久久則天天

則神。天則不言而信。神則不怒而威。致樂以治心者也。致禮以治躬則莊敬。莊敬則嚴威。心中斯須不和不樂。而鄙詐之心入之矣。外貌斯須不莊不敬。而易慢之心入之矣。故樂也者。動於內者也。禮也者。動於外者也。樂極和。禮極順。內和而外順。則民瞻其顏色而弗與爭也。望其容貌而民不生易慢焉。故德輝動於內而民莫不承聽。理發諸外而民莫不承順。故曰致禮樂之道。舉而錯之天下無難矣。

○先王之所以治天下者五。貴有德。貴貴。貴
老。敬長。慈幼。此五者先王之所以定天下也。
○立愛自親始。教民睦也。立敬自長始。教民
順也。教以慈睦而民貴有親。教以敬長而民
貴用命。○天子者與天地參。故德配天地。兼
利萬物。與日月並明明照四海而不遺微小。
其在朝廷則道仁聖禮義之序。燕處則聽雅
頌之音。行步則有環佩之聲。升車則有鸞和
之音。居處有禮。進退有度。百官得其宜。萬事

得其序。○政者正也。君為正。則百姓從政矣。
○古之為政。愛人為大。所以治愛人。禮為大。所
以治禮。敬為大。○天無私覆。地無私載。日月
無私照。奉斯三者以勞天下。此之謂三無私。
○好賢如縑衣。惡惡如巷伯。則爵不瀆而民
作愿。刑不試而民咸服。○君民者。子以愛之。
則民親之。信以結之。則民不倍。恭以蒞之。則
民有孫心。○下之事上也。不從其令。從其所
行。上好是物。下必有甚者矣。故上之所好惡。

不可不慎也。○上好仁。則下之為仁。爭先人。
○王言如絲。其出如綸。王言如綸。其出如緯。
故大人不倡游言。可言也不可行。君子弗言。
也可行也不可言。君子弗行也。則民言不危。
行。而行不危言矣。○君子道人以言而禁人。
以行。故言必慮其所終。而行必稽其所敝。則
民謹於言而慎於行。○有國者章善癉惡。以
示民厚。則民情不貳。○大臣不可不敬也。是
民之表也。廷臣不可不慎也。是民之道也。

大戴禮。上敬老。則下益孝。上順齒。則下益悌。上樂施。則下益諒。上親賢。則下擇友。上好德。則下不隱。上惡貪。則下恥爭。上強果。則下廉恥。○上者。民之表也。表正則何物不正。○上之親下也。如腹心。則下之親上也。如保子之見慈母也。上下之相親如此。然後令則從。施則行。○至禮不讓。而天下治。至賞不費。而天下之士悅。至樂無聲。而天下之民和。因天下之爵。以尊天下之士。此之謂至禮不讓。而天下

治。因天下之祿。以富天下之士。此之謂至賞。
不費而天下之士悅。天下之士悅。則天下之
明譽興。此之謂至樂。無聲而天下之民和。○
仁者莫大於愛人。知者莫大於知賢。政者莫
大於官賢。有土之君。修此三者。則四海之內
拱而俟。○天下器也。今人之置器。置諸安處
則安。置諸危處則危。而天下之情。與器無以
異。在天子所置爾。○國不務大。而務得民心。
佐不務多。而務得賢臣。得民心者。民從之。有

賢佐者士歸之○政善則民說民說則歸之
如流水親之如父母○古者聖王明義以別
貴賤以序尊卑以體上下然後民知尊君親
上而忠順之行備矣

論語敬事而信節用而愛人使民以時○慎終
追遠民德歸厚矣○為政以德譬如北辰居
其所而衆星共之○道之以政齊之以刑民
免而無恥道之以德齊之以禮有恥且格○
舉直錯諸枉則民服舉枉錯諸直則民不服

○臨之以莊則敬。孝慈則忠。舉善而教不能
則勸。○君使臣以禮。○君子篤於親則民興
於仁。故舊不遺則民不偷。○浸潤之譖。膚受
之愬。不行焉。可謂明也已矣。浸潤之譖。膚受
之愬。不行焉。可謂遠也已矣。○足食足兵。民
信之矣。○百姓足。君孰與不足。百姓不足。君
孰與足。○政者。正也。子帥以正。孰敢不正。○
舉直錯諸枉。能使枉者直。○先有司。赦小過。
舉賢才。○上好禮則民莫敢不敬。上好義則

民莫敢不服。上好信。則民莫敢不用情。夫如是。則四方之民襁負其子而至矣。○其身正。不令而行。其身不正。雖令不從。○修己以安百姓。○行夏之時。乘殷之輅。服周之冕。樂則韶舞。放鄭聲。遠佞人。鄭聲淫。佞人殆。○有國有家者。不患寡而患不均。不患貧而患不安。蓋均無貧。和無寡。安無傾。夫如是。故遠人不服。則修文德以來之。既來之。則安之。○天下有道。則禮樂征伐自天子出。○謹權量。審法

度修廢官。四方之政行焉。○寬則得衆。信則
民任焉。敏則有功。公則說。○君子惠而不費。
勞而不怨。欲而不貪。泰而不驕。威而不猛。○
因民之所利而利之。斯不亦惠而不費乎。擇
可勞而勞之。又誰怨。欲仁而得仁。又焉貪。君
子無衆寡。無小大。無敢慢。斯不亦泰而不驕
乎。君子正其衣冠。尊其瞻視。儼然人望而畏
之。斯不亦威而不猛乎。

大學。大學之道。在明明德。在新民。在止於至善。

○古之欲明明德於天下者先治其國欲治其國者先齊其家欲齊其家者先修其身欲修其身者先正其心欲正其心者先誠其意欲誠其意者先致其知致知在格物物格而后知至知至而后意誠意誠而后心正心正而后身脩身脩而后家齊家齊而后國治國治而后天下平○一家仁一國興仁一家讓一國興讓○堯舜帥天下以仁而民從之○上老老而民興孝上長長而民興弟上恤孤

而民不倍。是以君子有絜矩之道也。○民之所好好之。民之所惡惡之。此之謂民之父母。○得衆則得國。失衆則失國。○君子先慎乎德。有德此有人。有人此有土。有土此有財。有財此有用。德者本也。財者末也。外本內末。爭民施奪。是故財聚則民散。財散則民聚。○生財有大道。生之者衆。食之者寡。為之者疾。用之者舒。則財恒足矣。○未上有上好仁而下不好義者也。○國不以利為利。以義為利也。

中庸致中和。天地位焉。萬物育焉。○故大德必
得其位。必得其祿。必得其名。必得其壽。○故
大德者必受命。○夫孝者。善繼人之志。善述
人之事者也。○踐其位。行其禮。奏其樂。敬其
所尊。愛其所親。事死如事生。事亡如事存。孝
之至也。○郊社之禮。所以事上帝也。宗廟之
禮。所以祀乎其先也。明乎郊社之禮。禘嘗之
義。治國其如示諸掌乎。○為政在人。取人以
身。脩身以道。脩道以仁。○好學近乎知。力行

近乎仁。知恥近乎勇。知斯三者則知所以脩身。知所以脩身則知所以治人。知所以治人則知所以治天下國家矣。○凡為天下國家有九經。曰脩身也。尊賢也。親親也。敬大臣也。體羣臣也。子庶民也。來百工也。柔遠人也。懷諸侯也。脩身則道立。尊賢則不惑。親親則諸父昆弟不怨。敬大臣則不眩。體羣臣則士之報禮重。子庶民則百姓勸。來百工則財用足。柔遠人則四方歸之。懷諸侯則天下畏之。齊

明盛服。非禮不動。所以脩身也。去讒遠色。賤貨而貴德。所以勸賢也。尊其位。重其祿。同其好惡。所以勸親親也。官盛任使。所以勸大臣也。忠信重祿。所以勸士也。時使薄歛。所以勸百姓也。日省月試。既廩稱事。所以勸百工也。送往迎來。嘉善而矜不能。所以柔遠人也。繼絕世。舉廢國。治亂持危。朝聘以時。厚往而薄來。所以懷諸侯也。凡為天下國家。有九經。所以行之者一也。○唯天下至誠。為能盡其性。

能盡其性。則能盡人之性。能盡人之性。則能
盡物之性。能盡物之性。則可以贊天地之化
育。可以贊天地之化育。則可以與天地參矣。
○博厚所以載物也。高明所以覆物也。悠久
所以成物也。博厚配地。高明配天。悠久無疆。
○非天子不議禮。不制度。不考文。○王天下
有三重焉。其寡過矣乎。○故君子之道本諸
身。徵諸庶民。考諸三王而不謬。建諸天地而
不悖。質諸鬼神而無疑。百世以俟聖人而不

惑○君子動而世為天下道。行而世為天下法。言而世為天下則。遠之則有望。近之則不厭。○唯天下至聖為能聰明睿知。足以有臨也。寬裕溫柔。足以有容也。發強剛毅。足以有執也。齊莊中正。足以有敬也。文理密察。足以有別也。○唯天下至誠為能經綸天下之大經。立天下之大本。知天地之化育。夫焉有所倚。○君子篤恭而天下平。

孟子。不違農時。穀不可勝食也。數罟不入洿池。

魚鼈不可勝食也。斧斤以時入山林。材木不可勝用也。穀與魚鼈不可勝食。材木不可勝用。是使民養生喪死無憾也。養生喪死無憾。王道之始也。○百畝之田。勿奪其時。數口之家。可以無飢矣。謹庠序之教。申之以孝悌之義。頒白者不負戴於道路矣。七十者衣帛食肉。黎民不飢不寒。然而不王者。未之有也。○保民而王。莫之能禦也。○老吾老以及人之老。幼吾幼以及人之幼。治天下可運於掌。○

樂民之樂者民亦樂其樂。憂民之憂者民亦
憂其憂。樂以天下。憂以天下。然而不王者未
之有也。○君行仁政斯民親其上死其長矣。
○德之流行速於置郵而傳命。○以德行仁
者王。○以德服人者中心悅而誠服也。○尊
賢使能俊傑在位。則天下之士皆悅而願立
於其朝矣。○人皆有不忍人之心。先王有不
忍人之心斯有不忍人之政矣。以不忍人之
心行不忍人之政治天下可運之掌上。○賢

君必恭儉禮下。取於民有制。○堯舜之道。不以仁政。不能平治天下。○聖人既竭心思焉。繼之以不忍人之政。而仁覆天下矣。○欲為君盡君道。○天下之本在國。國之本在家。家之本在身。○仁不可為衆也。夫國君好仁。天下無敵。○得天下有道。得其民。斯得天下矣。得其民有道。得其心。斯得其民矣。得其心有道。所欲與之聚之。所惡勿施爾也。○君之視臣。如手足。則臣視君如腹心。○君仁。莫不仁。君

義莫不義○以善養人。然後能服天下○孝
子之至莫大乎尊親。尊親之至莫大乎以天
下養○以佚道使民。雖勞不怨。以生道殺民。
雖死不怨殺者○善政不如善教之得民也。
善政民畏之。善教民愛之。善政得民財。善教
得民心○易其田疇。薄其稅歛。民可使富也。
食之以時。用之以禮。財不可勝用也○親親
而仁民。仁民而愛物○知者無不知也。當務
之為急。仁者無不愛也。急親賢之為務○君

子之守修其身而天下平

孝經。愛敬盡於事親而德教加於百姓。刑于四海。蓋天子之孝也。○則天之明。因地之利。以順天下。是以其教不肅而成。其政不嚴而治。國語。先王之於民也。茂正其德而厚其性。昇其財求而利其器用。明利害之鄉。以文修之。使務利而避害。懷德而畏威。故能保世以滋大。○防民之口。甚於防川。川壅而潰。傷人必多。民亦如之。是故為川決之。使導。為民者宣之。

使言。故天子聽政。使公卿至於列士。獻詩。瞽獻典。史獻書。師箴。瞽誦。賦。矇誦。百工諫。庶人傳語。近臣盡規。親戚補察。瞽史教誨。耆艾修之。而後王斟酌焉。是以事行而不悖。○寬。肅宣惠君也。寬。所以保本也。肅。所以濟時也。宣。所以教施也。惠。所以和民也。本有保。則必固。時動而濟。則無敗功。教施而宣。則徧惠。以和民。則昇。若本固而功成。施徧而民昇。乃可以長保民矣。○夫聖王之制祀也。法施於民。則

祀之以死勤事則祀之以勞定國則祀之能
禦大災則祀之能捍大患則祀之非是族也
不在祀典○愛親明賢政之幹也禮賓矜窮
禮之宗也禮以紀政國之常也○興王賞諫
臣逸王罰之古之王者德政既成又聽於民
於是乎使工誦諫於朝在列者獻詩使勿堯
風聽臚言於市辯妖祥於謠考百事於朝問
謗譽於路有邪而正之盡戒之術也○國君
服寵以為美安民以為樂聽德以為聰致遠

以為明

五倫書卷之二